

Morning Dogri (NSD) National News Bulletin 28-04-2025

आकाशवाणी

- रक्षा मंत्री ते चीफ ऑफ डिफेंस स्टाफ होरें पहलगाम आतंकी हमले दे परेंत फौज दी तैआरिएं पर चर्चा कीती।
- जम्मू कश्मीर दे उपराज्यपाल मनोज सिन्हा होरें पहलगाम आतंकी हमले पर चर्चा आस्तै विधानसभा दा इक रोजा विशेष सत्र अज्ज सददेआ। आतंकी हमले दी निंदेया करने आला प्रस्ताह पास कीता जाग।
- दुनिया भर च प्रवासी भारतीयें पहलगाम च भयानक आतंकी हमले दे खलाफ बरोध प्रदर्शन कीते।
- राष्ट्रपति द्रौपदी मुर्मू अज्ज पैहले नागरिक अलंकरण समारोह च पद्म पुरस्कार प्रदान करगंन।
- आईपीएल टी-20 क्रिकेट च रॉयल चैलेंजर्स बेंगलुरु नै कल रातीं दिल्ली कैपिटल्स गी दिल्ली च 6 विकटें कन्नै हराया।

<><><><><><>

Rajnath CDS

रक्षा मंत्री राजनाथ सिंह होरें कल चीफ ऑफ डिफेंस स्टाफ (सीडीएस) जनरल अनिल चौहान हुंदे कन्नै मलाटी करियै पहलगाम आतंकी हमले दे परते च फौज दी तैआरिएं कन्नै सरबंधत महत्वपूर्ण मुद्दे पर चर्चा कीती। 22 अप्रैल दे आतंकी हमले च बक्ख-बक्ख राज्यें दे 26 सैलानी मारे गे हे। दिल्ली च रक्षा मंत्री हुंदे आवास पर होई दी एह बैठक तकरीबन 40एं मिंटें तगर चली। सूत्रें मूजब जनरल चौहान होरें रक्षा मंत्री होरें गी फौजी रणनीति ते इस दरान आतंकवाद दे खात्मे दिएं तैआरिएं बारे जानकारी दित्ती। रक्षा तैआरिएं कन्नै जुड़े दे मुख्य मुद्दे पर बैठक आस्तै बीएसएफ दे अधिकारी बी कल दिल्ली च मजूद हे। सीमा सुरक्षा बल दे महानिदेशक दलजीत सिंह चौधरी होरें बी कल गृह मंत्रालय दा दौरा कीता।

<><><><><><>

JKLA Special Session

जम्मू कश्मीर च मंत्रिमंडल दी गुजारश मगरा उपराज्यपाल मनोज सिन्हा होरें पहलगाम आतंकी हमले पर चर्चा करने आस्तै अज्ज विधानसभा दा इक रोजा विशेष सत्र सददेआ ऐ। विधानसभा पहलगाम आतंकी हमले च मारे गेदे लोकें गी श्रद्धांजलि देग जेहदे परेंत घटना दी सख्त निंदेया करदे होई इक प्रस्ताह पास कीता जाग। पहलगाम आतंकी हमला जेहदे च 25 सैलानी ते इक मकामी बसनीक मारे गे हे ते केई होर जख्मी होई गे हे ते नां छड़ा देसै च पर सारी दुनिया च सदमे दी लैहर लाई दित्ती ही।

<><><><><><>

JK CM-Pahalgam

जम्मू कश्मीर दे मुख्मंत्रि उमर अब्दुल्ला होरें आतंकवाद ते जित्थुआं आतंकवाद फैलाया जंदा ऐ, इनें स्रोतें खलाफ फैसला कुन कारवाई दा समर्थन कीता ऐ। पर कन्नै गै ऐसी कुसै बी कारवाई बारे सौहगा बी कीता ऐ जेहदे नै बेदोसें लोकें दी हत्या खलाफ बाज पुट्टने आले लोकें दे बक्ख बाहरें पेई जाने दी शँका पैदा होंदी होए। उमर अब्दुल्ला हुंदा एह ब्यान पहलगाम आतंकी हमले दे बाद कश्मीर घाटी आतंकवादिएं कन्नै सरबंध रखने मकान ढाए जाने ते सैंकड़ा बद्धे लोकें कोला पुच्छ गिच्छ सनें आतंकी तंत्र खलाफ चला'रदी कारवाई दे बाद आया ऐ।

<><><><><><>

Indian Diaspora Protest

पूरी दुनिया च भारतवासिएं जम्मू कश्मीर च पहलगाम आतंकी हमले च हिंदू सैलानिएं गी नशाना बनाए जाने खलाफ विरोध प्रदर्शन कीता ऐ। मैलबर्न दे फ़ैडरेशन स्वर्वायर थमां लंदन च पाकिस्तान उच्चायोग ते कोपनहेगन थमां लेइयै काठमांडू च पाकिस्तानी दूतावास तगर प्रदर्शनकारिएं इस आतंकी हमले दी निंदेया करदे होई लोडचदी कारवाई करने दी मंग कीती। पूरी दुनिया च भारतीय मूल दे लोकें इक जुट्ट होइयै आक्रोश ते दुख दा प्रदर्शन कीता ते आतंकवाद खलाफ आवाज पुट्टी।

Modi Ex-Gartia

प्रधानमंत्री नरेन्द्र मोदी होरें मध्यप्रदेश दे मंदसौर च इक हादसे च लोकें दे मारे जाने पर बसोस प्रगट कीता ऐ। इक सोशल मीडिया पोस्ट च श्री मोदी होरें उनें लोकें दे प्रति संवेदना प्रगट कीती जिनें अपने करीबिएं गी हादसे च गोआई ओड़ेआ ऐ। उनें मेद कीती जे जख्मी तौले गै नरोए होइ जांगन। प्रधानमंत्री होरें आखेआ जे प्रधानमंत्री राष्ट्री राहत कोष थमां हर इक मरने आले दे नेड़मे रिश्तेदारें गी दो लख रपे दी सिद्दी सहायता दे तौरा पर दिक्ती जाग। उनें दस्सेआ जे जख्मिएं गी 50 ज्हार रपे दी मदाद दिक्ती जाग।

<><><><><><>

Israel

इजराइल नै कल लेबनान दी राजधानी बेरुत दे दक्खनी इलाकें पर ब्हाई हमले कीते। एहदे शा पैहले उन्ने ईरान दे समरिन आले हिजबुल्ला आस्सेआ कथित तौरा पर बरती जा'रदिएं इमारतें गी खाली करने दा हुक्म जारी कीता हा। 4एं म्हीने पैहले लागू इस संघर्ष विराम दे बावजूद एह हमला होआ ऐ। इजराइल नै आखेआ ऐ जे उन्नै हिजबुल्ला दिएं मिसाइलें दे भंडार गी नशाना बनाया जेहड़ा ओहदे नागरिकें लेई बड़डा खतरा हियां। लेबनान दे राष्ट्रपति होरें हमले दी निंदेया करदे होई नवम्बर च युद्ध विराम दी प्रक्रिया च पैंची करियै बचोलियै दी भूमका नभाने आले अमरीका ते फ्रांस अगगे इजराइल पर हमले बंद करने लेई दबाह पाने दा आह्वान कीता। तोआई इजराइल सरकार नै आखेआ ऐ जे ओह हिजबुल्ला दी तरफा कुसै बी हमले जां चुनौती दा पूरी तगढडेयाई कन्नै परता देग।

<><><><><><>

Iran Blast

दक्खन ईरान दे बंदर अब्बास शैहर कश बंदरगाह च होए दे धमाके च मरने आलें दी गिनतरी 40 होई गई ऐ। शनिवार गी होए दे इस धमाके ते एहदे मगरा लग्गी दी अगग च इक ज्हार थमां मते लोक घायल होए हे। घटना दे सेई कारण दा अज्ज पता नेई लग्गा ऐ।

ईरान सरकार दे प्रवक्ता फातिमे मोहजेरानी होरें इक सोशल मीडिया पोस्ट च आखेआ जे ईरान च अज्ज इक दिनै दे शोक दी घोषणा कीती गई ऐ। ईरान दे राष्ट्रपति मसूद पेजेशकियन होरें कल बंदरगाह दा दौरा कीता ते हालात दा जायजा लैता।

<><><><><><><>

IPL

आईपीएल क्रिकेट च अज्ज राजस्थान रॉयल्स दा मकाबला गुजरात टाइटंस कन्नै होग। एह मैच जयपुर दे सवाई मानसिंह स्टेडियम च संजा साढे 7 बजे शुरू होग। एहदे शा पैहले कल ऐतवारें दऊं मैच खेड्डे गे। पैहले मैच च मुंबई इंडियन्स नै लखनऊ सुपर जायंट्स गी 54 रंज कन्नै हराया। 216 रंज दे लक्ष्य दा पिच्छा करदे होई लखनऊ दी टीम 20एं ओवरें 161 रंज गै बनाई सकी। तोआई इक दुए दिलचस्प मकाबले च कल रातीं रॉयल चैलेंजर्स बैंगलुरु नै दिल्ली कैपिटल्स गी 6एं विकटें कन्नै हराई दित्ता। 163 रंजें दे लक्ष्य दे परते च बैंगलुरु 15.3 ओवरें च 4 विकटां मोहाइयै 165 रंज बनाए। बैंगलुरु लेई क्रुनाल पांडया नै सब्बने शा मते 73 रंज बनाए ते नॉट आउट रेह। उनेंगी प्लेयर ऑफ द मैच घोषत कीता गेआ। विराट कोहली नै 51 रंज बनाए दा योगदान दित्ता। दिल्ली कैपिटल्स लेई अक्षर पटेल नै दऊं विकटां लैतियां। दिल्ली नै पैहले बल्लेबाजी करदे होई 20एं ओवरें च 8एं विकटें दे नुक्सान पर 162 रंज बनाए हे।

<><><><><><><>